



Za četiri osobe uhapšene u akciji Lift zatražen pritvor

SIPA zaplijenila 11 kilograma eksploziva

Tužilac traži pritvor za Harisa Hodžića, Mustafu Šemića, Nikolu Pandžu i Muhameda Mehmetija. Mjere zabrane predložene za uhapšene Mensuda Sijarića i Marija Prcea

Tužilaštvu BiH jučer je na saslušanje predato šest osumnjičenih za formiranje organizirane kriminalne grupe koja se bavila nelegalnom preprodajom oružja, a koji su uhapšeni u akciji Lift koja je u protekla dva dana provedena na području Mostara, Sarajeva i Bugojna.

Arsenal oružja

Za četvericu uhapšenih predložen je jednomjesečni pritvor i to za Harisa Hodžića (32) iz Travnika, Mustafu Šemića (56) iz Kamena, Nikolu Pandžu (57) iz mjesta Raška gora kod Mostara te Muhameda Mehmetija (37) iz Sarajeva dok su mjere zabrane predložene za osumnjičene Mensuda Sijarića (54) iz Godijeve u Srbiji, te Marija Prcea (37) iz Mostara.

-Tužilac je predložio pritvor zbog opasnosti od bjekstva osumnjičenih, kao i zbog osnovane bojazni da bi osumnjičeni boravkom na slobodi pokušali utjecati na svjedoke, te da bi mogli ponoviti isto ili slično krivično djelo - saopćeno je iz Tužilaštva BiH.

Tokom pretresa u okviru ove akcije na nekoliko lokacija pronađeno je i privremeno oduzeto 11 kilograma eksploziva razne



Naoružanje zaplijenjeno u akciji Lift

vrste i namjene, 29 pušaka, 34 pištolja, 4.771 komada municije raznog kalibra, 21 ručnu bombu, 4,7 kg baruta, 123 inicijalne kapisle za eksploziv, 40 kapisli za lovačke puške, jednu zolju, jednu granatu, jedan štapin za paljenje eksploziva dužine 100 metara i četiri štapina za paljenje eksploziva nepoznate dužine, 11 prigušivača i druge predmete.

Šestorka je, kako se moglo saznati u Tužilaštvu BiH, oružje krijumčarila tokom 2015. godine i to na području BiH, Srbije i Njemačke, a istraga u ovom

slučaju je pokazala da su krijumčari oružje i to uglavnom pištolje prodavali podzemlju, odnosno kriminalcima kako u regionu tako i u Evropi.

Tečni eksploziv

Sve navedene aktivnosti realizirane su po naredbama Tužilaštva BiH i Suda BiH, a poseban vid podrške pružila je Federalna uprava civilne zaštite. Uposlenici FUCZ-a, kako nam je pojasnio Fahrudin Solak, direktor ove institucije, odazvali su se na poziv tužioca, a pošto je u pretresima pronađen eksploziv

u vrlo nestabilnom stanju.

- Prilikom zaplijene oružja pronađen je eksploziv koji je prelazio u nestabilno, tečno stanje, pa su naši stručnjaci angažirani kako bi eksploziv uklonili i uništili na našem poligonu - istakao je Solak. Za krivično djelo za koje se terete osumnjičeni, odnosno organizirani kriminal, u vezi sa krivičnim djelom neovlašteni promet oružjem i vojnom opremom te proizvodima dvojne upotrebe, predviđena je zatvorska kazna od šest mjeseci pa do deset godina. E.F.